

# NEWSLETTER

## OLIMPIJSKOG KOMITETA BiH



No.13 april/maj 2022



Dragi sportisti i sportski radnici,  
Dragi prijatelji,

Nakon održane 3. redovne sjednice Generalne skupštine Olimpijskog komiteta BiH, sa sigurnošću možemo reći da je OK BiH jači i složniji nego ikada, a predstavljeni rezultati, realizovane i planirane aktivnosti svjedoče o kontinuiranom napretku rada Olimpijskog komiteta BiH, njenih članica sportskih saveza BiH i sportskih radnika a sve u cilju osnaživanja sportista i sportskog sistema BiH.

Da Olimpijski komitet BiH baštini Olimpijski duh i naše najvrijednije naslijeđe Zimske Olimpijske igre Sarajevo 1984, već smo pokazali idejom i inicijativom organizacije prvog višesportskog događaja poslije ZOI '84, a to je Evropski olimpijski festival mladih Sarajevo i Istočno Sarajevo 2019. A sada u našu Olimpijsku baštinu upisujemo i najmlađu članicu – Karling asocijaciju BiH, koja je nastala upravo kao rezultat održanog EYOF-a Sarajevo i Istočno Sarajevo 2019.

Pripreme za predstojeće Olimpijske igre u Parizu 2024 su u punom jeku, te pored potpisanih trinaest stipendija, OK BiH je izdvojio 50.000 KM za 5 olimpijaca sa A normom sa Ljetnih olimpijskih igara Tokyo 2020 za pripreme i kvalifikaciona takmičenja. Jedino sistemskim ulaganjem u sportiste i sport možemo očekivati i toliko željenu olimpijsku medalju, a voljeli bismo kada bi i državni nivoi vlasti pratili aktivnosti Olimpijskog komiteta BiH, i počeli ozbiljno ulagati u vrhunski sport Bosne i Hercegovine.

Već u petom mjesecu uspješno smo učestvovali na dva višesportska takmičenja, od kojih Zimske olimpijske igre u Pekingu, i Zimski EYOF u Vuokatti-iju. Predstoji nam organizacija učešća na Mediteranskim igrama Oran 2022 i Ljetnom EYOF-u u Banskoj Bistrici. Olimpijski komitet BiH je i u sklopu ova dva višesportska događaja izdvojio znatna sredstva sa ciljem učešća što većeg broja naših sportista, ali i u očekivanju zavidnih sportskih rezultata.

Znamo da sportske rezultate moraju da prate i određena finansijska sredstva, a koja su trenutno u Bosni i Hercegovini kada je u pitanju sport, vrlo oskudna. Olimpijski komitet BiH svjestan je da ta sredstva mora potražiti iz drugih dostupnih izvora, i stoga vrijedno već sedam godina radi na realizaciji projekata koji se finansiraju sredstvima Evropske Unije. Ovi projekti, osim usvajanja novih znanja i vještina, imaju pozitivan uticaj na izgradnju svijesti kod šire publike, jačaju samu organizaciju i postavljaju je rame uz rame sa nekim od vodećih sportskih organizacija u Evropskoj uniji.

Stoga, Olimpijski komitet BiH kao organizacija koja uči, ali i iskusna organizacija u pisanju i realizaciji EU projekata, organizuje drugu po redu radionicu za EU projekte isključivo za svoje članice, sportske saveze BiH. OČEKUJEMO VAS!

prof.dr. Izet Rađo, potpredsjednik OK BiH

## IN MEMORIAM



**Ivica Osim Švabo**  
**(1941 – 2022)**

*“Prošao sam cijeli svijet i džaba sve to...Ko se jednom vode napije sa Sebilja, poslije je samo dolijeva...”*

Ivica Osim – Švabo

Bosna i Hercegovina je ostala bez jednog od njenih najpoznatijih sportskih, ali i ljudskih, ambasadora. Ivica Osim Švabo zauvijek nas je napustio u 81. godini života.

Rijetki su fudbaleri koji se mogu pohvaliti da su učestvovali na Olimpijskim igrama. Još su rjeđi oni koji su imali tu čast da Olimpijadi dožive i kao fudbaleri i kao treneri.

Švabo je jedan od njih. U Tokiju 1964. se borio na terenu da osvoji olimpijsku medalju, a u Los Angelesu 1984.godine, kao trener se okitio bronzom sa najvećeg sportskog takmičenja.

Svi klubovi i reprezentacije na čijem čelu je bio plavokosi Bosanac redali su uspjehe i svugdje je ostavljao svoj neizbrisivi trag. I svugdje je isticao ko je i odakle je.

Dobitnik je brojnih nagrada, ali svakako najznačajnija nagrada je uspomena koju će na Švabu još dugo u sebi nositi mnogi znani i neznani Bosanci i Hercegovci.

Cijela Olimpijska porodica Bosne i Hercegovine oprašta se od velikog čovjeka, olimpijca, fudbalera, trenera, vizionara.

Olimpijski komitet Bosne i Hercegovine upućuje najiskrenije saučešće porodici i prijateljima Ivica Osima.

## Pere Miró: “Sjajna stvar u ovih 30 godina u MOK-u je rad sa izuzetnim ljudima”



U svojoj kancelariji u Olimpijskoj kući, Pere Miró se smije odbrojavanju koje je njegovo osoblje nacrtalo na zidu: R-1! Stigao je dan penzionisanja za Katalonca, koji je skoro 30 godina obavljao različite strateške funkcije u MOK-u. Ali i aktivnu penziju, jer će nastaviti da radi kao viši savjetnik predsjednika MOK-a.

Pere Miró se pridružio MOK-u u novembru 1992. godine na zahtjev predsjednika Huana Antonija Samarancha, s kojim je blisko

sarađivao tokom Igara u Barseloni. Radeći u tandemu sa sportskim direktorom MOK-a, formalizirao je način na koji je MOK komunicirao sa Organizacionim komitetima. Zatim je uslijedila uzbudljiva karijera sa sve većim odgovornostima i kontinuiranim povjerenjem predsjednika koji su naslijedili Samarancha: Jacquesa Roggea i Thomasa Bacha.

Pere Miró je savladao sve izazove. Između ostalog, imao je zadatak da uspostavi, a potom i vodi Odjel za olimpijsku solidarnost, prije nego što je stvorio i potom vodio Odsjek za odnose s nacionalnim olimpijskim komitetima. Napustio je ovu funkciju 2019. godine, ali je ostao na ključnoj ulozi zamjenika generalnog direktora za odnose s Olimpijskim pokretom.

*Sport je škola života, način života. Njegova uloga u našim društvima je važnija nego ikad.  
Pere Miró*

Uvijek je slušao i davao savjete, sa svojim prepoznatljivim osmijehom i ljubaznošću. Putovao je svijetom, stvarajući čvrste veze sa svim interesnim stranama Olimpijskog pokreta, i sklapajući prijateljstva.

Kada ga pitate na šta je najponosniji, on s ljubavlju priča o svom timu, sa mješavinom priznanja i emocija.

*Nisam baš kreativna osoba, ali mislim da znam slušati, odabrati dobre ideje i onda ih provesti u djelo. To je ono što sam radio cijeli život.  
Pere Miró*

Nije lako sažeti u samo nekoliko redova karijeru izuzetnog čovjeka vođenog strašću prema sportu i njegovim vrijednostima. Strast koju je 15 godina provodio igrajući vaterpolo i koju nikada nije prestao dijeliti sa svima koji su ga sreli.

Učestvovali ste u uspjehu 18 Olimpijskih igara. Šta su za vas bili najvažniji momenti?

Prva je svakako bila Seul 1988, moje prve Igre kao posmatrača. Otkrio sam njihovu veličinu i univerzalnost. Bio sam impresioniran, ali mislim da sam se i uplašio prvi put u životu, jer sam znao da ćemo morati da organizujemo Igre četiri godine kasnije!

Drugi odlučujući trenutak za mene su očigledno bile Igre u Barseloni. Evo male priče. Bio sam u Glavnom operativnom centru zajedno sa još tri zamjenika generalnog direktora zaduženih za operacije. Tamo smo bili zaglavljani tokom čitavih Igara. Na dan Svečanog

otvaranja rečeno nam je da možemo na stadion, ali da će jedan od četvorice direktora morati ostati na dužnosti kako bi se pozabavio svim hitnim slučajevima. Ja sam ostao, jer nisam mogao da napustim ostatak tima, koji nije imao izbora po tom pitanju. Svi smo imali jedinstveno vrijeme gledajući sve na TV-u, te smo te večeri otvorili nekoliko boca katalonske kafe.

Treći trenutak su bile Igre u Pekingu u februaru ove godine, uprkos teškim okolnostima kojih se svi sjećamo. Organiziranje Igara je vrlo složena stvar, a rizik kada stalno radite na rješavanju svakodnevnih problema je da sva magija nestane. U Pekingu, pošto sam više imao pozadinsku ulogu, imao sam više prilike da vidim Igre. Prvi put sam mogao da odem u tri olimpijska sela, da tamo spavam i radim sa svojim timovima. Mogao sam vidjeti Igre kroz oči ovih mladih ljudi koji su doživjeli ne više od jedne ili dvije edicije Igara u svojoj karijeri. I ponovo sam otkrio magiju koju sam osjetio u Seulu.

Kako vidite ulogu sporta u našem sve problematičnijem i podijeljenom svijetu?

Sport igra vitalnu ulogu u našim sadašnjim društvima. Ako budem iskren, moram priznati da je nama kao organizatorima 1992. godine bilo važno kako će Igre utjecati na nas na lokalnom nivou. Željeli smo da ponudimo sportistima jedinstvenu binu na kojoj će nastupiti i predstavu za cijeli svijet. Danas gledamo kako Igre i sport mogu pomoći u poboljšanju zdravlja, poštovanju životne sredine i promoviranju rodne ravnopravnosti.

Pristup se dosta promijenio. Na kraju krajeva, vizija Pierrea de Coubertena o korištenju sporta za izgradnju boljeg svijeta relevantnija je nego ikad.

Tokom ovih 30 godina, također sam vidio snagu sporta koja može da obnovi/izgradi. Pomogao sam MOK-u da bude aktivan u procesu obnove u zemljama razorenim ratom. Vidio sam šta je sport dao muškarcima i ženama Bosne, Istočnog Timora ili Afganistana. Danas moramo vjerovati u tu moć više nego ikad.

Koju poruku biste željeli podijeliti s mladim članovima osoblja MOK-a?

**Veoma ste sretni! Poziv Olimpijskih igara je aktuelniji nego ikad. Igre i sport pomažu da se svijet pokrene naprijed. Možemo to učiniti ako vjerujemo u sebe.**

Imate li planove?

**Biću tu i spreman da pomognem ako zatrebam!**

Na ličnom nivou, uradiću tri stvari koje sam dugo želio. Prvi je naučiti svirati klavir. Muzika je oduvijek imala posebno mjesto u mom životu, ali nikada nisam naučio da sviram instrument. Takođe ću naučiti jezik, njegovu kulturu i historiju. I na kraju, istražiti ću Švicarsku pješice. Da, ostaću u Švicarskoj. To me podsjetilo kada mi je, nekoliko dana nakon što sam stigao u MOK, predsjednik Samaranch rekao: „Došao si ovdje jer voliš Igre i Olimpijski pokret. Ali još više će ti se svidjeti život u Švicarskoj.” Bio je u pravu!

Intervju sa Pere Miró preuzet sa stranice [MOK-a](#).

# AKTIVNOSTI OLIMPIJSKOG KOMITETA BIH

## ODRŽANA 3. REDOVNA SKUPŠTINA OLIMPIJSKOG KOMITETA BIH



U Olimpijskom komitetu BiH 30.03.2022.g. je održana 3. redovna Skupština Olimpijskog komiteta BiH uz prisustvo delegata koji dolaze iz 39 sportskih saveza Bosne i Hercegovine.

Delegatima su prezentirani Izvještaj Nadzornog odbora OK BiH, Izvještaji o radu i Finansijski izvještaj za proteklu godinu, kao i planovi za tekuću 2022. godinu. Delegati su jednoglasno usvojili prezentirane izvještaje i planove uz mnoštvo pohvala za aktivnosti i rad Olimpijskog komiteta BiH, u izuzetno zahtjevnoj i pandemijom opterećenoj 2021. godini.

I pored izuzetno kompleksne ekonomske situacije u kojoj vrhunski sport u BiH egzistira, bez usvojenog budžeta na državnom nivou i granta za vrhunski sport, svi delegati su izrazili veliko zadovoljstvo postignutim rezultatima i realiziranim aktivnostima Olimpijskog komiteta BiH i sportskih strukovnih saveza BiH kao nebudžetskih organizacija.

*„Drago mi je da su svi izvještaji usvojeni jednoglasno, da smo ispunili sve zacrtane programske i finansijske ciljeve, te da smo adekvatno i u skladu sa našim mogućnostima i misijom podržali naše najbolje sportiste.“* rekao je predsjednik OK BiH prof.dr Milanko Mučibabić.



## PRIJEM KARLING SAVEZA BiH U ČLANSTVO OLIMPIJSKOG KOMITETA BOSNE I HERCEGOVINE



Olimpijski komitet BiH je svoju porodicu uvećao za još jednog punopravnog člana. Na sjednici Skupštine koja se održala 30.03.2022. godine, u članstvo Olimpijskog komiteta BiH je primljen Karling savez BiH, te OK BiH u svom članstvu sada broji 39 sportskih saveza Bosne i Hercegovine (30 olimpijskih i 9 neolimpijskih sportova), i ovaj broj se iz godine u godinu uvećava

*„Zahvaljujemo se u ime Karling saveza BiH! Posebno se zahvaljujemo Predsjedništvu i članovima Izvršnog komiteta OK BiH, kao i Generalnom sekretaru koji su nam pomogli da u protekle dvije godine savladamo sve prepreka na putu registracije Saveza. Ideja za formiranje Karling saveza BiH nastala je u vrijeme održavanja Evropskog olimpijskog festivala mladih 2019 godine (EYOF 2019), kada je grupa sportskih radnika dobila zadatak da organizuje takmičenje u karlingu, sportu koji u tom trenutku nije imao formiran ni jedan klub ni Savez. Danas, imamo formirane klubove i Saveze koji imaju svoju organizacionu strukturu, članove koji rade i takmičare koji treniraju i nastupaju na takmičenjima“, izjavio je predsjednik Karling saveza BiH, mr.sci Miro Klepić.*




Svojoj novoj članici Olimpijske porodice, OK BiH je odlučio da dodijeli sportsku opremu, te je Predsjednik OK BiH prof.dr. Milanko Mučibabić ovom prilikom istakao: „Ovo je nastavak projekta iz 2020. godine, u sklopu kojeg su sportski savezi BiH – punopravne članice OK BiH, a koji se nalaze na Olimpijskom programu, dobili opremu za reprezentativne selekcije, a sve u cilju uniformisanosti i adekvatnog nastupa na međunarodnim takmičenjima. Karling savez BiH je najmlađi

savez koji se priključio Olimpijskoj porodici, te im je OK BiH tim povodom odlučio uručiti opremu u kojoj će već narednog vikenda nastupiti na međunarodnom takmičenju u Sloveniji“.

## IZVJEŠTAJ O RADU OLIMPIJSKOG KOMITETA BiH

Predstavljamo Vam Izvještaj o radu Olimpijskog komiteta BiH za mandatni period 10.11.2020. - 10.03.2022. godine (16 mjeseci).



Olimpijski komitet Bosne i Hercegovine svojim aktivnostima doprinosi jačanju globalnog ugleda Bosne i Hercegovine, te kroz sport, sportska tijela i sportske organizacije ostvaruje saradnju sa međunarodnim sportskim organizacijama i institucijama.

Unatoč svim izazovima sa kojima se susretao u proteklih 16 mjeseci, Olimpijski komitet BiH predano je radio na implementaciji brojnih projekata Međunarodnog olimpijskog komiteta, Olimpijske solidarnosti, Evropskih olimpijskih komiteta i Evropske komisije.

U toku mandatnog perioda, za vrijeme predsjedavanja gdn. Marijana Kvesića, realizirani su projekti Olimpijskih stipendija kako za Ol Tokyo tako i za ZOI Peking, obezbjeđena je finansijska podrška za evidentne učesnike Igara kroz projekte Tokyo+ i Kontinentalni grant, te su prepoznate mlade olimpijske nade.

Također Olimpijski komitet Bosne i Hercegovine je uspješno organizovao pripreme i odlazak naših vrhunskih sportista na „Ol Tokyo 2020“ i „ZOI Peking 2022“, na kojima je učestvovalo ukupno 13 olimpijaca.

Na Ljetnim olimpijskim igrama Tokyo 2020 ostvaren je i najbolji rezultat bosanskohercegovačkog sporta u historiji Igara, a to je 5. mjesto taekwondoiste Nedžada Husića, kao i na Zimskim olimpijskim igrama Peking 2022 gdje je Elvedina Muzaferija zabilježila najbolji rezultat u ženskoj konkurenciji u alpskom skijanju.

Izvještaj o radu možete pročitati [OVDJE](#) i saznati više o aktivnostima i projektima, ali i o radu OK BiH.

## PODRŠKA OLIMPIJSKOG KOMITETA BIH VRHUNSKIM SPORTISTIMA



16. redovna sjednica Izvršnog komiteta OK BiH, održana je 27. aprila 2022. godine, a kojom je predsjedavao prof.dr Milanko Mučibabić zajedno sa potpredsjednicima OK BiH prof.dr Izetom Rađom i Marijanom Kvesićem. Na pomenutoj sjednici su razmatrane aktivnosti OK BiH predviđene Planom i Programom za tekuću godinu.

Jedna od najznačajnijih tema je svakako bila podrška vrhunskim sportistima, a posebno sportistima koji su na OI Tokyo 2020 (Japan), učestvovali sa ostvarenom A normom (Amel Tuka-atletika, Larisa Cerić-judo, Mesud Pezer-atletika, Lana Pudar-plivanje i Nedžad Husić-taekwondo) koji i nakon Olimpijskih igara potvrđuju vrhunske rezultate.

Uvažavajući činjenicu da je OI Pariz 2024 (Francuska), za dvije godine, Olimpijski komitet BiH je odlučio da gore navedenim olimpijcima sa A normom, u ovoj godini dodijeli po 10.000,00KM, kako bi mogli da planiraju pripreme i nastupe i poboljšaju svoje rezultate, te u narednom periodu ponovo pokušaju da ostvare A olimpijsku normu za OI Pariz 2024.

Napominjemo da OK BiH za OI Pariz 2024. u predolimpijskom periodu (32 mjeseca) stipendira 13 sportista, potencijalnih kandidata za ostvarenje olimpijske norme među kojima su i gore pomenuti Olimpijci.

Pored navedenih Olimpijskih igara Pariz 2024. OK BiH je razmatrao i donio Odluku da za Mediteranske igre Oran 2022 (Alžir) u potpunosti finansira učešće za 22 sportista koji su kandidati za najveći plasman i odličja kao i njihovih 7 pratećih trenera (ukupno 29 osobe).

OK BiH je također ostavio mogućnost sufinansiranja sportskim savezima BiH za one sportiste koji pokazuju dobre rezultate i Mediteranske igre bi im pomogle da steknu dodatna iskustva i mogućnost „dokazivanja“ na velikim sportskim takmičenjima.

Pored ove podrške Olimpijski komitet BiH je finansirao i završne pripreme i učešće sportista koji su učestvovali na nedavno održanom Zimskom EYOF-u Vuokatti 2022 (Finska) koji se održao od 20.-25.03.2022.

Olimpijski komitet BiH će također finansirati završne pripreme i učešća najboljih



mladih sportista učesnika Ljetnjeg EYOF-a Banska Bistrica 2022 (Slovačka), koji se održava od 24.-30.07.2022.g.

Napominjemo da je OK BiH udruženje građana koje nije na državnom budžetu, te je navedena sredstva obezbijedio isključivo kroz projekte i sponzorskim ugovorima.

Predsjednik OK BiH prof.dr Milanko Mučibabić: „Ovom prilikom se OK BiH zahvaljuje uvažanim sponzorima koji podržavaju rad OK BiH i u ovim teškim vremenima za sport.



*Također napominjemo da od državnih organa nismo dobili nikakva sredstva do sada, kako od Savjeta ministara BiH, tako i od entitetskih ministarstava nadležnih za sport.*

*i sportistima, a mnogo više bi imali mogućnosti za bolje rezultate kada bi nam državni organi i nadležna ministarstva za sport omogućili adekvatno finansiranje, kako mladih sportista, tako i potencijalnih i evidentnih kandidata za OI Pariz 2024., te njihovih saveza i klubova iz kojih dolaze“.*

## GOSTOVANJE PREDSJEDNIKA OK BiH PROF. DR MILANKA MUČIBABIĆA U EMISIJI SPORT FOKUS

Predsjednik OK BiH, prof. dr Milanko Mučibabić bio je gost emisije Sport Fokus 11. aprila 2022. godine, gdje je govorio na temu Mediteranskih igara u Alžiru (Oran), projektnih djelovanja OK BiH, finansiranja BH sporta, i druge relevantne teme.

TV gostovanje možete pogledati [OVDJE](#).



## ČELNICI OK BIH U POSJETI AMBASADI N.R.KINE U BIH

Predsjednik OK BiH prof.dr Milanko Mučibabić i potpredsjednik OK BiH prof.dr.Izet Rađo, posjetili su NJ.E. Ji Pinga, ambasadora N.R. Kine u BiH.

Tokom posjete razgovaralo se o nedavno završenim ZOI u Pekingu na kojima je učestvovala i Bosna i Hercegovina. Razgovaralo se i o saradnji između univerziteta u Sarajevu i Banja Luci sa univerzitetima u Kini, za daljnju edukaciju i uzajamnu pomoć na polju nauke i sporta.



Također, NJ.E. Ji Ping se zanimao za tok projekta kandidatura ZOI Barselona-Sarajevo 2030, te je dao punu podršku suorganizaciji i poželio uspješnu kandidaturu gradova Barselona-Sarajevo. Čelnici OK BiH su završili posjetu NJ.E. Ji Pingu sa zaključkom da su obje strane otvorene za buduće zajedničke projekte i saradnju.

Posjeti je prisustvovao i olimpijac Mirza Nikolajev, učesnik ZOI Peking 2022 u sankanju, koji je tokom Igara stekao veliku popularnost na društvenim mrežama u Kini.

## PREDSTAVNICI FINA-E I LEN-A POSJETILI OK BIH



U okviru službene posjete Plivačkom savezu BiH, predstavnici Svjetske (FINA) i Evropske (LEN) plivačke asocijacije, sa upravom Plivačkog saveza BiH i Dogradonačelnicom Grada Sarajeva posjetili su Olimpijski komitet BiH, gdje ih je ugostio Generalni sekretar OK BiH.

Ova historijska posjeta čelnika FINA i LEN Plivačkom savezu BiH i Olimpijskom komitetu BiH je od izuzetne važnosti za budući razvoj plivačkog sporta u našoj zemlji koji je zahvaljujući Lani Pudar u prošloj godini doživio veliku ekspanziju. Svakako, jedna od tema je bila i razvoj naših mladih i perspektivnih plivača te olimpijskih kandidata, ali i razvoj plivačke infrastrukture i objekata koji adekvatno ne prate razvoj ovog olimpijskog sporta u Bosni i Hercegovini.

Olimpijski komitet BiH je bio domaćin ovog sastanka u interesu što bolje saradnje sa sportskim savezima BiH i međunarodnim sportskim asocijacijama kako bi na najbolji način bio predstavljen sportski sistem BiH na međunarodnom planu, a sve u cilju što produktivnijih razgovora koji za krajnji cilj imaju obezbjeđenje benefita za naše plivače i Plivački savez BiH.

Visoku delegaciju FINA-a i LEN-a su činili: Husain Al Mussalam-predsjednik FINA, Antonio da Silva-predsjednik LEN i potpredsjednik FINA, Josip Varvodić-prvi potpredsjednik LEN i član FINA biroa, Anthony Ervin-Olimpijski prvak iz SAD-a i Tomy Tarraf-predsjednik Odjela za razvoj sportista i Specijalne projekte Olimpijskog vijeća Azije.

Domaćin sastanka ispred OK BiH je bio dr sci. Said Fazlagić, generalni sekretar OK BiH zajedno sa Edhemom Pašukanom-potpredsjednikom Plivačkog saveza BiH, Jusufom Borićem-predsjednikom Skupštine Plivačkog saveza BiH, Damirom Đedovićem-članom Upravnog odbora Plivačkog saveza BiH i Azurom Kuduzovićem-generalnim sekretarom Plivačkog saveza BiH.

Ispred Grada Sarajeva je prisustvovala Anja Margetić-dogradonačelnica Grada Sarajeva i bivša olimpijka Bosne i Hercegovine u plivanju.

*Moja priča.*



## ZIMSKI EYOF • VUOKATTI 2022



U finskom Vuokatti-ju od 20. do 25.03.2022. održan je 15. po redu zimski Evropski omladinski olimpijski festival.

Tokom Ceremonije otvaranja učesnicima su se obratili Predsjednik Finske Sauli Niinistö, Predsjednik Evropskih olimpijskih komiteta Spyros Capralos i Predsjednik Organizacionog odbora EYOF-a Mika Kilpeläinen, nakon čega su predstavnici sportista, sudija i trenera položili EYOF zakletvu.

Program je bio prilagođen karakteru Festivala koji je namijenjen mladim sportistima Evrope uz niz zabavnih muzičkih i plesnih nastupa. Po ustaljenoj praksi delegacija Grčke je otvorila defile, a predstavnici Bosne i Hercegovine su izašli 7. po redu. Zastavu Bosne i Hercegovine su nosili Miloš Stević (skijaško trčanje) i Zara Husedžinović



(umjetničko klizanje). Plamen mira ispred Arene Vuokatti su donijeli finska biatlonka Kaisa Mäkäräinen i skijaš Matti Heikkinen, a zatim ga predali skijašici Vilmu Nissinen, koja je imala čast da upali Plamen mira čime je Festival zvanično otvoren.

Tokom pet dana takmičarskog programa, skoro 1000 mladih takmičara se nadmetalo u 9 sportova. Bosnu i Hercegovinu je predstavljalo četvoro sportista u pratnji 3 trenera, a njihovi rezultati su u nastavku:

<b>R E Z U L T A T I</b>	<b>#BHTeam</b>	
	<b>Miloš Stević</b> <i>skijaško trčanje</i>	
	disciplina 10 km slobodni stil   57. mjesto (57/76) disciplina 7,5 km klasični stil   71. mjesto (71/73) disciplina 1,1 km sprint   52. mjesto (52/74)	<b>EYOF 2022 VUOKATTI</b>
	<b>Milivoje Mačar</b> <i>alpsko skijanje</i>	
	disciplina slalom   *bez plasmana disciplina paralel slalom   53. mjesto (53/79)	
<b>Sara Plakalović</b> <i>skijaško trčanje</i>		
disciplina 7,5 km slobodni stil   54. mjesto (54/64) disciplina 5 km klasični stil   61. mjesto (61/61) disciplina 1,1 km sprint   53. mjesto (53/64)		
<b>Zara Husedžinović</b> <i>umjetničko klizanje</i>		
kratki i slobodni program   31. mjesto (31/31)		
<b>#EOC #OKBIH #EYOFVUOKATTI2022</b>		

Podsjećamo da je ovo prvo izdanje EYOF-a nakon 2019. godine kada su domaćini bili Sarajevo i Istočno Sarajevo. Sam Festival se smatra vitalnim korakom u razvoju sporta mladih gdje se sportisti po prvi put susreću sa velikim multisportskim takmičenjem. Učešće na EYOF-u u mnogobrojnim slučajevima bude prekretnica u karijeri mladih sportista, od kojih značajan procenat izbori učešće na Olimpijskim igrama.

# PREDSTOJEĆA TAKMIČENJA I AKTUELNOSTI

## PARIZ 2024 I LA 28



Izvršni odbor (IO) Međunarodnog olimpijskog komiteta (MOK) odlučio je o kriterijima kvalifikacija i rasporedu sesija takmičenja, kao i o težinskim kategorijama i formatima takmičenja na čekanju za Olimpijske igre Pariz 2024. Također se raspravljalo o principima za postavljanje disciplinskog okvira za sportski program Olimpijskih igara LA28.

Osim toga, preporučio je Međunarodnim Federacijama (IF) da se pozabave pitanjem minimalne starosti u svojim sportovima i ako je potrebno, izvrše odgovarajuća prilagođavanja svojih propisa.

### Pariz 2024

Kvalifikacioni sistem za 32 sporta u okviru sportskog programa Pariz 2024 odobrio je IO MOK-a. Oni opisuju različite načine na koje se sportisti i Nacionalni olimpijski komiteti mogu kvalificirati za Igre u Parizu 2024.

Kriterijumi za sve discipline mogu se vidjeti na zvaničnoj strani MOK-a. Kvalifikacioni sistemi određuju put kojim će se sportisti i timovi kvalifikovati za Igre, kao i minimalne kriterijume koje će sportisti morati da ispune da bi bili kvalifikovani.

Izvršni odbor MOK-a je također odobrio raspored takmičenja koji odražava ambiciju Pariza 2024 da ponudi spektakularne Igre. Raspored sesije postavlja ključni okvir za planiranje Igara i opisuje vrijeme početka i završetka svake od sesija. Naime, dogovoreni termini će omogućiti svim sportistima da učestvuju u najmanje jednoj od Olimpijskih ceremonija.

Ukupno će biti na programu 32 sporta, što će rezultirati 19 dana takmičenja od 24. jula (dva dana prije ceremonije otvaranja) do 11. avgusta, sa 329 takmičenja za medalju i ukupno 762 sesije. Pariz 2024 će sada nastaviti da radi na dodavanju specifičnih

događaja u sportske sesije, fokusirajući se na ključne principe, uključujući iskustvo sportista, međunarodnu publiku, emitovanja i rodnu ravnotežu.

Pored toga, MOK je prihvatio formate takmičenja u streljaštvu i kategorije težine za boks i dizanje tegova. Ovo je odraženo u revidiranom programu u odgovarajućim sistemima kvalifikacija po sportu.

Sedam muških i šest ženskih težinskih kategorija biće dio boksačkog programa u Parizu, a po prvi put će ovaj sport dostići potpunu rodnu ravnopravnost u učešću sportista.

Kao i u Tokiju 2020, takmičenja u dizanju tegova će biti rodno izbalansirana, sa pet muških i pet ženskih težinskih kategorija i jednakim brojem sportista.

Dana 7. decembra 2020., Izvršni odbor MOK-a (EB) odobrio je program događaja i kvote sportista za Olimpijske igre Pariz 2024, koje su usmjerene na rodnu ravnopravnost i mlade.

Olimpijske igre Pariz 2024 će biti prve potpuno rodno izbalansirane igre, sa tačno 50 posto učešća muškaraca i žena, nadovezujući se na rodnu ravnopravnost već postignutu za Tokio 2020., na kojoj je učestvovalo 47,8 posto žena. Pariz 2024 također će obilježiti rast mješovitih događaja na programu, u poređenju sa Tokijem 2020, sa 18 na 20.

## **LA28**

9. decembra 2021. godine Izvršni odbor MOK-a odobrio je set od šest tema za reviziju disciplina u sportskom programu LA28.

Nadovezujući se na šest tema i naglašavajući važnost postavljanja jasnog okvira za reviziju i definisanje programa sporta, discipline i događaja, IO MOK-a usvojio je i programske principe LA28.

Ovi principi odražavaju Olimpijsku povelju, preporuke Olimpijske agende 2020+5 i viziju LA28 za Igre. Cilj ovih principa je da obezbijede jedan jasan okvir za jačanje procesa za reviziju i definisanje programa sporta, discipline i događaja za LA28.

Programski principi će se takođe koristiti za vođenje analize i početne evaluacije potencijalnih sportova koje predlaže Organizacioni odbor za sportski program LA28.

Finalizacija disciplina za svaki sport biće završena 2023. godine, zajedno sa sportovima koje je predložio LA28 OCOG. Očekuje se da će događaji i kvote sportista biti potvrđene u decembru 2024.

Tekst preuzet sa [EOK Newsletter](#).

## MEDITERANSKE IGRE • ORAN 2022



*"Sve velike međunarodne sportske događaje karakteriziraju trenuci stresa i radosti, napetosti i slavlja. Često je to emocionalna vožnja roller coaster-om jer smo toliko uronjeni u srce događaja, odlučni da podržimo svoj tim ili naše omiljene sportiste. Mediteranske igre u Oranu 2022 nisu izuzetak!";* poručili su iz Organizacionog odbora Mediteranskih igara Oran 2022.

Za potrebe organizacije Ceremonije otvaranja MI Oran 2022, gledaoci će moći pogledati predstavu najrazvijenijih alžirskih talenata. Tema i predloženi program za sada ostaju tajni, ali čini se da su se nadležni timovi opredjelili za istorijsku predstavu sa fokusom na Alžir. Nešto što će oduševiti zahtjevnu publiku, ali uvijek naklonjenu kulturi i istoriji.

Ove godine, Olimpijski komitet Bosne i Hercegovine učestvuje u 11 sportova na Mediternaskim igrama Oran 2022 koje se održavaju u alžirskom gradu Oranu od 25.06. do 05.07. 2022. godine.

## LJETNI EYOF • Banska Bystrica 2022

Sastanak Šefova misije EYOF Banska Bystrica 2022 održan je od 27. do 28. aprila 2022. godine. Prezentovane su sve relevantne informacije koje su neophodne za dolazak, boravak i takmičenje nacionalnih timova.

Sastanku su prisustvovala 42. NOK-a, među njima delegacija NOK-a BiH kojeg je predstavljala Samra Jurišić, Šef misije.

Za organizaciju EYOF-a Banska Bystrica izdvojeno je 16 miliona EUR-a, iz više izvora finansiranja. BiH nacionalni tim će se takmičiti u tri sporta na programu EYOF-a: atletika, judo i plivanje.





# SPORTSKI STRUKOVNI SAVEZI BiH

## TRENERSKI SAVEZ BiH

### Završen trenerski kurs level 1



U organizaciji Teniskog saveza Bosne i Hercegovine završen je još jedan trenerski kurs "Level 1", koji se održao u Sarajevu od 02.04. do 13.04.2022 godine.

Trenerski kurs "Level 1" uspješno je organizovan putem fonda Međunarodnog Olimpijskog komiteta u sklopu programa Olimpijske Solidarnosti. Ovaj projekat je dobio finansijsku

podršku uz pomoć Olimpijskog komiteta BiH, te u saradnji sa Internacionalnom Teniskom Federacijom.

Kao i do sada prije trenerskog kursa "Level 1" održan je kurs "PLAY TENIS" na kojem je učestvovalo 37 kandidata iz cijele Bosne i Hercegovine.

Broj učesnika na trenerskom kursu "Level 1" je bio ograničen na 24 kandidata, a sve po pravilima "Olimpijske Solidarnosti" i ITF-a.

Veoma nam je drago da su po prvi put oba predavača na trenerskom kursu "PLAY TENIS" i "Level 1" bili bosanskohercegovački treneri sa završenom ITF level 3 licencom Kenan Maličbegović i Vanja Stuhli.

## JUDO SAVEZ BiH

### Evropa Judo Kup za seniore i seniorke Sarajevo 2022

Evropa Judo Kup za seniore i seniorke Sarajevo 2022. održao se od 07. - 08.05.2022. godine u Sarajevu u Areni Hotela Hills na Ilidži, gdje je učestvovalo 250 takmičara i takmičarki iz 30 zemalja Evrope i Svijeta.

Evropa Judo Kup za seniore i seniorke je takmičenje koje se nalazi u kalendaru EJU (Evropske Judo Unije), te se boduje za Evropsku ranking listu.

Reprezentaciju Bosne i Hercegovine predvodila je najbolja bh. džudistkinja Larisa Cerić, a osim nje boje naše zemlje u ženskoj konkurenciji branile su Narin Handan (-48 kg), Mila Petrović (-52 kg), Anđela Samardžić (-57 kg), Tamara Đukić (-57 kg) i Marija Šukić (-78 kg).

Muški dio tima uz Tonija Miletića, koji je na posljednjem Sarajevo Openu održanom u februaru ove godine osvojio bronзанom medaljom, činili su Ahmed Mulalić (-60 kg), Ali Handan (-60 kg), Domagoj Pusić (-73 kg),



Darko Topalović (-73 kg), Petar Škrba (-73 kg), Vuka Divljan (-73 kg), Mustafa Hebib (-81 kg), Srđan Ajvaz (-90 kg) i Vasilije Vujičić (+100 kg).

I ovoga puta Džudo savez Bosne i Hercegovine dobio je visoke ocjene Evropske džudo unije (EJU) za organizaciju Evropskog džudo kupa za seniore, a do kraja ove godine naš Savez očekuje organizacija još tri takmičenja.

## HOKEJAŠKI SAVEZ BiH

### Juniorska hokejaška reprezentacija BiH osvojila Svjetsko prvenstvo i izborila mjesto u viši rang IIHF



Naš glavni grad dobio je čast organizacije Svjetskog prvenstva III-B divizije po prvi put.

Nakon ubjedljive prve dvije pobjede nad Južnoafričkom Republikom i Luksemburgom, u trećem kolu bila je dovoljna pobjeda ponovo nad reprezentacijom Južnoafričke Republike, da juniorska hokejaška reprezentacija BiH osvoji Svjetsko prvenstvo III-B divizije i tako izbori mjesto u III-A diviziju.

## KARLING SAVEZ BOSNE I HERCEGOVINE „LJUBLJANA OPEN 2022“

Karling reprezentacija Bosne i Hercegovine imala svoj prvi nastup na međunarodnom takmičenju „Ljubljana Open 2022“.

Takmičenje je održano od 06. do 08. maja u ledenoj dvorani SC Zalog u Ljubljani uz učešće 24 ekipe iz 11 zemalja sa tri kontinenta (Evropa, Azija, Amerika).

Naša ekipa je zabilježila 3 pobjede od pet utakmica i osvojila je deveto mjesto.



## STONOTENISKI SAVEZ BiH Evropske kvalifikacije za seniorke u stolnom tenisu, Sarajevo



Stonoteniski savez Bosne i Hercegovine je bio domaćin Evropskih kvalifikacija za seniorke, grupa C, koje je održano u dvorani 1 Centra Skenderija od 1. do 3. aprila 2022. godine.

U dvorani Skenderija ukupno je nastupilo 10 ženskih reprezentacija podijeljenih u dvije kvalifikacione grupe. Reprezentacija Bosne i Hercegovine je bila u grupi sa Izraelom, Kiprom, Crnom Gorom i Kosovom. U drugoj grupi su bile ekipe Švicarske, Finske, Škotske, Malta i Latvije.

Otvaranje je upriličeno prvog dana kvalifikacija uz prisustvo predstavnika institucija Kantona Sarajevo, Ministarstva za sport i kulturu, predstavnika Turističke zajednice Sarajevo, BH Telecom i dr. koji su nam pomogli i podržali organizaciju ovog takmičenja. Evropske kvalifikacije je otvorio ministar Samir Avdić.

Evropske kvalifikacije su privukle veliki broj ljubitelja stolnog tenisa, dvorana je bila svo vrijeme popunjena te je naša reprezentacija imala podršku i obezbjedila plasman u naredni krug kvalifikacija. Televizije BH, Federalna i Kantonalna su medijski pratili ovo takmičenje premda je obezbjeđen i direktan prenos svih mečeva preko ETTU kanala.

Reprezentacija BiH nastupila je u sastavu Biogradlić Džana, Gnjatić Marija, Mešetović Harisa i Lovrić Ema sa selektorom Mujezinović Amela. Osim naše reprezentacije u naredni krug kvalifikacija plasirale su se Izrael i Crna Gora, odnosno Švicarska, Finska i Latvija. Za učešće na Evropskom prvenstvu naša reprezentacija je u grupi sa Engleskom i Estonijom koje se igra u oktobru ove godine.

Evropska stonoteniska asocijacija je pohvalila organizaciju ovih kvalifikacija te uvrstila Stonoteniski savez BiH za kandidata za organizaciju Evropskog pojedinačnog prvenstva 2023.



## SAVEZ DIZAČA TEGOVA BIH Izabrano novo rukovodstvo



Na Izornoj Skupštini održanoj 19.04.2022. Savez dizača tegova je izabrao novo rukovodstvo. Pojednim članovima Uprave je potvrđen, odnosno produžen mandat dok su za neka mjesta izabrane nove osobe.

Članovi Uprave su:

1. Nermin Begić, predsjednik
2. mr. sci. Nedim Mašić, Generalni sekretar – ponovo izabran
3. Enisa Mašić, potpredsjednica – ponovo izabrana
4. Prof.dr.sci. Mensur Vrcić – ponovo izabran
5. Emir Karabrahimović
6. Benjamin Druškić
7. Faris Durak
8. Almira Lizde
9. Almir Karkelja – ponovo izabran
10. Miro Ružičić – ponovo izabran

Na navedenoj sjednici su izabrani i ostali organi, Nadzorni odbor, Disciplinska komisija, a na sjednici Upravnog odbora su izabrani selektor (produžen je mandat Namiku Omeroviću još 4 godine), treneri reprezentacije (donešena je odluka da su treneri klubova ujedno treneri reprezentacije, jer svi treneri zadovoljavaju uvjete Zakona o sportu). Izabran je i ljekar reprezentacije, kao i Stručni saradnici za sudijske poslove i za takmičarske poslove.

Reprezentacija u dizanju tegova u sastavu:

Nejla Kalača, takmičarka  
Faris Durak, takmičar  
Namik Omerović, Selektor i  
Haris Durak, trener

otputovala je 01. maja u Grčki Heraklion na Svjetsko juniorsko prvenstvo.

## BH • TEAM

### TAEKWONDO | NEDŽAD HUSIĆ SREBRENI NA G2 TURNIRU U BELGIJI

Na Belgian Open G2 svoj nastup imao je najbolji bh. taekwondoista Nedžad Husić. U prvom meču savladao je predstavnika Norveške sa 25:2, da bi u drugom meču bio bolji od predstavnika Francuske sa 3:1. U trećem meču ponovo je za protivnika imao Francuza kojeg je savladao sa 4:1, a u polufinalu je bio bolji od predstavnika Belgije sa 17:8 čime se plasirao u finale.

Finalnu borbu je predao i okitio se srebrnom medaljom, a vrijedi istaći da je za ovu godinu sakupio maksimalan broj bodova na G turnirima.

Stoga naš najbolji taekwondoista na novoj Svjetskoj ranking listi u kategoriji do 74 kg zauzima 2 mjesto. U kategoriji do 80 kg na Olimpijskoj listi Nedžad se nalazi na 17. mjestu.



### PLIVANJE | SJAJNI REZULTATI LANE PUDAR NA OTVORENOM PRVENSTVU TURSKE



U periodu od 13.4. do 17.4., u turskom gradu Edirne održalo se Otvoreno prvenstvo Turske. Na ovom prvenstvu sudjelovala je i naša najbolja plivačica Lana Pudar.

U finalnoj utrci u disciplini 50m delfin Lana je osvojila prvo mjesto s vremenom 26.73.

U disciplini 200m slobodno Lana je s vremenom 02:04.57 osvojila četvrto mjesto u apsolutnoj kategoriji i postigla najbolje vrijeme u kategoriji juniorki.

Drugog dana otvorenog prvenstva Turske koje se održalo na olimpijskom bazenu u Edirneu, Lana Pudar je osvojila prvo mjesto u disciplini 100m slobodno sa vremenom 56.66, što je ujedno i vrijeme novog državnog rekorda za djevojčice do 17 godina.

Lana je osvojila i prvo mjesto u disciplini 100m delfin sa vremenom 58.32. Lana je sa ovim vremenom potvrdila A FINA normu za Svjetsko seniorsko prvenstvo koje će se održati krajem mjeseca juna u Budimpešti.



Drugog dana Evropskog Judo Kupa najbolja bh. džudistkinja Larisa Cerić osvojila je zlato u kategoriji +78kg. Larisa je u finalu pobijedila Wiktoriju Lis iz Poljske.



Srebrnu medalju za BiH donio je Toni Miletić koji je u finalu kategorije do 90kg poražen od Belgijanca Karela Fourbeta.

Na Evropskom kupu za kadete koji se održao u Bukureštu - Rumuniji, Sofija Pajić, članica Džudo kluba „Zvijezda“ Banja Luka nas je obradovala bronzanom medaljom.

Osim Sofije bronzane medalje su osvojili i Lana Lubura u kategoriji +70kg, te Vidak Maljević u konkurenciji do 81kg.



Na Evropskom kupu u Češkoj - Teplice, Sofija je upisala četiri pobjede nad reprezentativkama Njemačke, Holandije, Rumunije i Češke, te jedan poraz od reprezentativke Francuske, osvojivši time bronzanu medalju.

Da je bronza još sjajnija govori i to da je za osvajanje bronzne savladana prva nositeljica Svjetske rang liste za kadete takmičarka Češke Hajdarova.

„Veliki planovi su pred nama, polako koračamo ka njima, a u narednom periodu očekuje nas prvenstvo Evrope i Svijeta za kadete i evropski judo tur za kadete.“ rekao je trener Jasenko Delić

## KLIZANJE | TARIK OMERAGIĆ SVJETSKO PRVENSTVO U BRZOM KLIZANJU MONTREAL

Seniorski reprezentativac Bosne i Hercegovine u brzom klizanju (short track), Tarik Omeragić, uz podršku Saveza klizačkih sportova Bosne i Hercegovine, nastupio je od 8. do 10.04.2022. na Svjetskom prvenstvu u Montrealu (Kanada).

U konkurenciji 46 najboljih brzoklizača svijeta, naš reprezentativac je imao solidan nastup. U trkama na 1500m i 1000 m zauzeo je 30. mjesto, dok je na 500 m diskvalifikovan.



## KLIZANJE | BH. ICE DANCE PAR NASTUPIO NA SVJETSKOM PRVENSTVU U UMJETNIČKOM KLIZANJU



Seniorski reprezentativci Bosne i Hercegovine, plesniklizački par, Ekaterina Mitrofanova i Vladislav Kasinskij, nastupili su na Svjetskom prvenstvu u umjetničkom klizanju (ISU World Figure Skating Championships) koje se održalo u Montpellieru (Francuska).

Podsjećamo, od 20. do 27. marta, u ledenoj dvorani Sud de France Arena, takmičila su se 122 najbolja klizača svijeta

u umjetničkom klizanju (Single, Pair Skating i Ice Dance kategorije).

Naš par je 25.3. imao svoj prvi nastup (Rhythm Dance). Kaća i Vlad su osvojili 55,01 bod, iako su popravili svoj lični rekord za 6 bodova, nisu uspjeli da uđu u finale prvenstva i nastupe drugi put (Free Dance). Takmičenje su završili na 27. mjestu.

## TRIATLON | MUSTAFA JAMAK 18. NA EVROPSKOM TRIATHLON JUNIOR KUPU U YENISEHIRU

Naš triatlonac, juniorski reprezentativac Bosne i Hercegovine u triatlonu, 15-ogodišnji Mustafa Jamak, proteklog vikenda je nastupio na Evropskom juniorskom kupu održanom u Yenişehir, Turska, te je zauzeo 18. mjesto, od ukupno 38 takmičara koji su nastupili.

Mustafa je utrku završio za 58:10 te je u cilj ušao 3 minute nakon pobjednika, a u ukupnom plasmanu je bio drugi od svog godišta.





## EU PROJEKTI

### INOVATIVNI NAČIN UPRAVLJANJA NOKOVA I SPORTSKIH ORGANIZACIJA - RINGS



U prostorijama Olimpijskog komiteta BiH 30.03.2022. godine održana je prezentacija Erasmus + projekta RINGS - Put ka inovativnom načinu upravljanja NOKova i Grassroot sportskih organizacija.

Riječ je o međunarodnom projektu kojeg kao partner projekta u Bosni i Hercegovini realizuje Olimpijski komitet Bosne i Hercegovine, uz koordinaciju EU kancelarije Evropskih olimpijskih komiteta, te u partnerstvu sa 11 Nacionalnih olimpijskih komiteta Evrope.

Glavni cilj projekta je modernizacija strateškog menadžmenta Nacionalnih olimpijskih komiteta Evrope sa specifičnim fokusom na upravljanje promjenama, kreiranje odnosa sa internim i eksternim interesnim grupama i odnosima sa javnošću. S tim u vezi kreiran je poseban Priručnik za strateški menadžment i Priručnik za odnose sa javnošću a koji je prezentiran članovima Skupštine Olimpijskog komiteta BiH.

Cilj prezentacije finalnih proizvoda RINGS projekta je omogućiti Sportskim strukovnim savezima Bosne i Hercegovine pristup posebno kreiranim alatima i priručnicima kako bi unaprijedili svoj rad u oblastima strateškog menadžmenta i odnosima sa javnošću. Priručnici će biti dostupni na web stranici Olimpijskog komiteta Bosne i Hercegovine u septembru 2022. godine.

Olimpijski komitet Bosne i Hercegovine već duži niz godina usko saraduje sa EOK EU kancelarijom, a posebno u polju realizacije projekata koji se finansiraju sredstvima Evropske unije. Sigurni smo da će finalni rezultati i proizvodi projekta RINGS naći svoju praktičnu primjenu kako u Olimpijskog komitetu BiH, tako i u Sportskim strukovnim savezima BiH, te i šire BiH sportske zajednice.

**JER ZNANJE JE MOĆ!**

## ODRŽANA RADIONICA „SPORTOM ZA PRAVILA” U OLIMPIJSKOM KOMITETU BOSNE I HERCEGOVINE



U sklopu realizacije Erasmus + sport projekta pod nazivom „SPORT for RULES – širenje pozitivnih vrijednosti kroz poboljšanje sudijske uloge“ 08.04.2022. godine održana je radionica za profesore, nastavnike i studente sporta i tjelesnog odgoja. Sport for Rules je projekat kojeg Olimpijski komitet Bosne i Hercegovine realizuje u svojstvu partnera u Bosni i Hercegovini, a uz koordinaciju Italijanske odbojkaške federacije i 7 partnerskih organizacija iz Evropske Unije.

Cilj radionice je bio predstaviti materijal koji je nastao kao rezultat ovog projekta. Materijal detaljno objašnjava ulogu sudija u sportu, njihovih vještina i vrijednosti koji oni generiraju u samoj igri.

U konačnici, bez sudija nema ni igre, stoga jedan od ciljeva ovog projekta je i podstaknuti što više mladih da se okušaju u ulozi sudija.

Pored korisnih informacija, materijal sadrži i niz vježbi koju nastavnici i profesori mogu primjeniti u svojim fiskulturnim salama i terenima kako bi među učenicima prezentirali važnost uloge sudija, te i pozitivnih vrijednosti u sportu.

Studenti Fakulteta sporta i tjelesnog odgoja Univerziteta u Sarajevu su imali priliku učestvovati u igrama kao praktični dio radionice kako bi iz sudijske perspektive, i perspektive budućih nastavnika i profesora sporta i tjelesnog odgoja znali približiti svojim učenicima važnost poštivanja sudija, koja u konačnici znači i poštivanje same igre.

Realizacija ovog projekta je do kraja 2022. godine, te nas očekuje mnoštvo aktivnosti u širenju pozitivnih vrijednosti kroz poboljšanje sudijske uloge u sportu. Olimpijski komitet Bosne i Hercegovine će zasigurno do kraja projekta organizovati još mnoštvo sličnih događaja.

**ŠIRIMO POZITIVNE VRIJEDNOSTI U SPORTU!!!**

## OK BIH PARTNERSKI SASTANAK | SPORT4RULES



U sklopu realizacije Erasmus + sport projekta pod nazivom „SPORT4RULES – širenje pozitivnih vrijednosti kroz poboljšanje sudijske uloge“, 19. i 20.04.2022. godine održan je partnerski sastanak u prostorijama Olimpijskog komiteta Bosne i Hercegovine.

Partnerskom sastanku su prisustvovali:

Odbojkaški savez Italije; Ministarstvo za omladinu i sport Bugarske; Međunarodni savez za sportska službena lica; Odbojkaški savez Hrvatske; Odbojkaški savez Turske; Košarkaški savez Francuske; Univerzitet u Sevilji- Španija

Na sastanku su prezentovane smjernice i objašnjeni koraci za dalju implementaciji projekta:

**UNIVERZITET U SEVILJI** - kreirat će edukativni program namjenjen za sudije, a sve sa ciljem izgradnje mekih vještina potrebnih za unapređenje sudijske uloge u sportu.

**MEĐUNARODNI SAVEZ ZA SPORTSKA SLUŽBENA LICA** - izvršit će istraživanje o broju sudija na lokalnom, regionalnom i međunarodnom nivou u partnerskim državama te i strukturu sudija prema spolu. Također u istraživanju će biti uključena analiza potreba sudija za edukacijom u oblasti mekih vještina. Cilj ovog radnog paketa je kreirati program mentorstva za mlade sudije.

OK BIH je pored uloge domaćina prezentovao do sada realizovane aktivnosti projekta među njima je i nedavno održana radionica za profesore/nastavnike i studente sporta i tjelesnog odgoja.

Realizacija ovog projekta je do kraja 2022. godine, te nas očekuje mnoštvo aktivnosti u širenju pozitivnih vrijednosti kroz poboljšanje sudijske uloge u sportu.

**ŠIRIMO POZITIVNE VRIJEDNOSTI U SPORTU!**

## INTERVJU SA... **MUSTAFOM JAMAK**



**OK BiH:** Kad si počeo da se baviš triatlonom, zašto baš triatlon sport i da li je neko uticao na tu odluku?

**MUSTAFA JAMAK:** Triatlonom sam se počeo baviti 2017. godine, zato jer mi se činio interesantnim kao dječaku i otac mi je znao za taj sport pa me je prijavio na prvu utrku.

**OK BiH:** Pored triatlona da li si se bavio nekim drugim sportovima?

**MJ:** Trenirao sam fudbal dosta dugo kao dječak i kratko sam trenirao judo.

**OK BiH:** Da li imaš nekog sportskog uzora?

**MJ:** Nemam nekog posebnog sportskog uzora, mada mi je veoma drag naša legenda Edin Džeko.



**OK BiH:** *Koja je razlika između ljetnog i zimskog treninga?*



**MJ:** Razlika je u tome što se treninzi biciklizma zimi rade u kući na trenažeru, i što se nekada koristi traka za trčanje, dok se ljeti sve to radi napolju zbog povoljnijih vremenskih uslova. Može se reći da se zimi mora više improvizirati.

**OK BiH:** *Koji je najbolji rezultat koji si ostvario i na koji si najviše ponosan?*

**MJ:** Ostvario sam dosta dobrih rezultata na regionalnim takmičenjima od kojih bi izdvojio medalju sa Balkanskog prvenstva 2021, mada mi je cilj početi osvajati evropske medalje u narednim godinama



## ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:  
(klikom na ikone)



©2022. Olimpijski komitet Bosne i Hercegovine. Sva prava zadržana.  
[www.okbih.ba](http://www.okbih.ba)

Specijalnu zahvalnost dugujemo sponzorima i partnerima OK BiH.  
Klikom na logo posjetite njihove oficijelne stranice.

